

筆記小說大觀

集

夷

宋

堅

洪邁著

志

第八冊

進步書局校印



夷堅志卷三十六

宋 洪邁撰

祁酥兒

祁酥兒者。亳州人。父為秘書省校書郎。酥兒性警慧。孝愛異常。誦詩書禮義。皆不緣指教。而自曉。母久病。步履艱難。方七八歲時。已代管家務。事無巨細。悉幹之。得宜年十五歲。其冬。母病忽加劇。酥憂急。不知所為。潛持一錢詣佛堂供像前。拜而祝曰。吾母病甚。將割股肉以療。敢擲此錢。以下其可。願錢文上嚮。否則反之。擲已驗之。文果上嚮。心獨喜。快謂佛真許我。遂持刀以割右股。不暇遮。傳自燔之於火。屑為丸。類真藥粒之狀。與母言。醫別換藥來。戒曰。盡服此可愈。母接服之。疾經宿而瘳。酥謂符所願益喜。家人見其坐稍偏。怪問其故。猶閉匿不肯說。迫之再三。乃具以實告。皆大驚。亟求善藥護其創。創已先中風。浸浸傍攻四體。萬方調治。竟不瘥。危困之際。語家人云。吾取吾肉以救母。固已不愛吾身。母幸緣此以安。死亦何恨。但念父母年俱高。不得終養。因此有遺恨耳。泣數行下。遂絕。南城王補之為作傳曰。酥兒之心。猶可悲也。方其奮然舉刃之時。豈不知肌肉之裂。有不可忍之痛。為至難也。以為吾不如是。

不能盡其孝。故以始筭之年。最痛之身。怡然甘之。而忘其所以難也。其可悲至矣。予讀之。惜其無傳於世。為載之三。辛第一章。

諸暨山道人

復州教授長樂陳方。在大學時。一齋生。志鄉里及姓名嗜酒酣醉無度。未嘗留意燈窗事。適諸暨縣人招作門館。其家僕開酒坊。陳賀之曰。此正是君從游處。適我願兮。宜勿辭也。於是浮江而東。當淳熙十三年秋。解試望之。不參假。疑其已死。或傳似有所遇。不飲不食。夜不就榻。唯在書室中。講授如故。同舍生不以為然。及春。忽參學。眾以所聞質之。答曰。我生平日。酒多為累。故止不向口。若臨飯食。輒自覺飽。入夜全不思睡。亦不自知其然。同舍私相約。更迭陪之一宵。驗其是否。已而果如人言。扣之不肯說。久之始謂陳曰。彼家酒坊。距其居只半里。吾早間點授生徒罷。則徑造之。連沃數觥。及晚亦如之。一日醉甚。望坊外三四里。有一山奇崛幽邃可愛。信步往游。見一人卧松下。作而言曰。汝無時無節。不耽酒。豈不防損害性命。大可慮邪。道人着青布寬袍。長六七尺。昂昂一道流也。不覺敬異。宿醒頓醒。道人呼前。便授我隱訣數語。翻然而去。自是日。不復近酒饌。雖偃息枕上。亦不交睫。他無所云也。後收拾書策告別。不知所

終。

范端智棋戰

范元卿以棋品著聲於士大夫間。其歷處庠序。踐館閣。故無不知名。其弟端智亦優於此技。與兄相埒。而碌碌布衣。獨客於楊太傅府。楊每引至後堂。使諸小姬善奕者賭物。然率所約。不過數千錢之直。范常常得之。楊一日謂曰。聞君家苦貧。小小獲無濟於事。吾欲捐金幣三千緡。用明日為某妾一局之資。君能取勝。立可小康。范喜謝歸邸。不能旦。同寓之士。竊言范骨相之甚薄。恐無由能致橫財如是。及對局。既有勝矣。思行太過。失應一着。遂變捷為敗。素手而出。乃知非分財物。不容妄享。好利忘義之徒。可以內省也。

吳琦事許真君

饒州吏人吳琦。習熟刀筆。年二十三歲。即遷補職級。淳熙十四年五月八日。徙居於下西關。整頓神佛堂。鋪設位像。以所蓄壽星一軸。掛左壁。右方闕焉。每用興念。旋命畫工劉生。繪九州都仙太史高明大使像。以補之。所謂許真君也。至七月十四日。琦正午假寐。夢神人頎而長。戴方巾。反搭其半覆。而手繙簿書。披閱竟。呼黃彥發姓名。

黃者都孔目官也。琦前跪曰：郡吏賤役，亦注籍耶？神乃指示之曰：既是都吏，烏得無名？琦又白曰：如琦微下，不審他日到得此地位否？曰：但恐算候不及。復請曰：琦終身不至遭刑譴否？曰：無之。續問壽命妻孥。神檢簿使之觀。其簿式樣全如四縫笠之摺角，排別金星，歷歷繁耀。乃為言：汝命分只合一男一女。後來儘得。兼汝壽不長，不出四十。仍主暴夭。琦所以咨扣凡數端，悟其為神。欲加奉事，恨未得稱呼。乘其將去，挽裾而問之，應曰：汝不識我乎？我卽第一將真君也。又以不曉所言為請。傍一人若馭馬卒云：便是汝家神。右壁所事者，遂上馬而去矣。琦夢覺，悉書於冊。後九年，一旦吐血死。妻子曲折皆如言不差。

林氏館客全璧附

平江林兄弟，鄰居東西兩宅。各邀士人處書館。居東者建安陳希黯，賦性誠真。兄雖加敬禮而待之，與常時無異。弟所招閩中黃生，巧逢迎之術，脅肩諂笑，能得主人歡心。故相得極厚。束脩之外，遇有干亦應之。不靳。陳君每歎羨，謂已不如黃。忽抱病浸浸困劇。弟過意拯療，不能愈。髮如蓬葆而不可運櫛。主人使僕為梳理，數拒却之。遂至死。主悼惜無已，躬為治喪，方洗沐之次，見髻中有短紙一小卷，漫取視，蓋其抄錄。

主家事狀及言語疵瑕巨細不遺仍謹誌日月以備或失歡時為訐訴具也主大怒亟令舁其尸置於空室但置松棺斂葬湯君寶談其事予曰憶其婺州日義烏縣下巡檢館客田全璧以學課不如期陳狀并告其他過時淳熙十二年四月問其授其何時曰去歲五月二日入學及冬盡不肯償月給憤其無禮故具所聞見達於使君予視其條目二十餘項本末歷歷語之曰所言果實乎曰不敢一事相罔乃出一揭冊呈示則自去歲五月四日命寨兵伐木作胡床及五日擅用番樂等事予曰汝方以初二日就館舍兩夕之間便密疏其不法何也使詣曹供對杖之二十而荷項令眾於寨門郡人皆傳笑謂全璧遂成碎璧全生之過受罰於生前而黃生之慝乃暴於身後皆非佳士不滿賢者一笑云

李彥勝夢賦

餘子李彥勝興宗習舉子業詞賦甚有可稱淳熙甲午請鄉薦至紹熙壬子當免舉夢就試省闈遇紫袍神人持金榜揭示之曰此題目也且謂子細言之至再李熟視之乃人主天下之儀表賦并韻脚及出處上下文歷歷明白即濡墨引筆一揮八韻略無停思殊以驩躍既寤遂綴輯一篇髣髴猶憶夢中隔聯佳處朝夕潛自諷詠雖

從學者在席下。亦不與之言。時邑貴趙子貞。為吏部尚書。度必知貢舉。李嘗作館客。在法合迴避。趙念別院取數少。預貽書止其行李。曰。倘吾命分當得。何論人少難易。固已格夢兆。夫復奚疑。遂絕計貢筭而西。癸丑正月。到都城。趙果司文柄。李牒赴別試。所賦題乃帝王以納諫為聖。而貢院出題。并韻脚。悉與夢合。始以事告人。知無復科級之望。且歎曰。造物小兒相戲。可謂惡劇。竟下第而歸。

二屠鼎烹

德清民鄭八。酷於屠牛。每行刀時。先刺其項。血從中傾注數斗。目尚開闔。觀者念痛苦之狀。或稱救苦天尊。或誦解脫真言。助之冥果。鄭恬然弗之恤。母在越。嘗渡江省之。到中塗。日暮值雨。急進路傍古祠中。半夜後。聞堂上軒訢有聲。畫燭前導。一神據按坐。吏押老人至。首問曰。汝在生之日。何得於佛殿上殺牛。命赴湯鑊獄。次搦鄭出。鄭知其不佳。拜而乞命。神怒汝所屠。不可勝計。尚敢然。亦命提赴湯獄。是時猶未墮鼎鑊。明日倩人告其母。備述境界。因使人知戒語。畢厥死。母忽夢其求功德。莫測所以。少頃訃音至。

張淵侍妾

觀察使張淵。紹興中為江東副總管。居建康。每以高價往都城買美妾。列屋二十人。而御之甚嚴。小過必撻。嘗盛具延客。皆環侍執樂。歌舞精妙。一座盡傾。妾競競自將。不敢游目窺視。無論及言談也。中席淵起更衣。坐客葉晦叔之側。一姝最麗。乘間語之曰。恭人在太尉左右。想大有樂處。姝慘容不答。但舉手指筵上燭云。絳蠟分明。會得晦叔後語。予曰。猶憶其風流慧悟也。招士馮伯起為館賓。待之特異。仍治宅西一室。使挈妻子入處之。元宵三節。為張燈。自盃淵赴府宴。長姬領眾妾訪其妻。小鬟見床褥華雅。戲卧其上。馮竊至。遂與之合。既罷。長姬知之。歸以白淵。淵隱而弗問。經旬。又約馮共飯。飯畢。設茶於他軒。望砌下橫一劍。一竹筥。一小缸。置糞。馮掩鼻謂守兵不謹。將使屏之。淵笑曰。此正為先生設。元宵之事。豈忘邪。先呼長姬。及小鬟杖之三十。然後云。先生須均受此辱。已乃伏劍。馮趨下受杖。泣而乞命。淵曰。然則只以不潔代之可也。馮度不得免。拱手言。願賜清汁。淵逼使滿杓而食。乃遂食之。後十年。葉樞密督規軍馬。駐建康。投書陳禦戎方略。被人云。此正是喫屎秀才耳。傳以為笑。淵暮歲徙家臨安。過八十而終。

山門寺僧

德興去縣十五里有山門寺。其僧了詮者。年四十四歲時。遇一善術士。戒之曰。大師命連犯凶。然五月內當主災殃。須百事謹畏。關防不然。恐不能免。詮聞言憂怖。是月自朔日。屏跡不出。端坐誦經。度日如年。常若禍至。及晦日。闔寺僧相慰。珣曰。師兄可出矣。詮曰。猶有半日之期。未竟。不知獲脫否。到昏暮。寂無他虞。詮亦自喜。少頃。提燈籠如廁。過山坎下。適巨蛇蟠居石上。見燈光。躍而赴之。正齧詮足。大叫仆地。其徒奔救以還。所傷處。血肉潰腐。遂連脛骨如截。歲餘乃愈。然不復能行步。春秋幾八十。慶元三年秋始死。

朱安恬獄

浮梁安東鄉民朱安恬。與兄仲有者異居。仲以貧悴。立所居室契。就恬售錢。而挈一女來寄食。其男細四。仲所以求索於恬者。非一。恬復以屋契畀其男。令自為主。仍往婦家贅。慶元二年。兄弟爭小故。仲自拈磚搥扉。欲以撓恬。因去從女婿宿食。至五月。復訪恬處。又舉手頓地微損。恬扶勸使歸。旋得痢疾。越八日而死。細四覓棺於恬。不得。鄰保懷宿憾。諷之詣縣。訴為叔用杖毆殺。縣令鄭伯膺。以筆楚之。詞上於州。下司理院。不移元勘。以殺兄無證。奏裁得旨。處死。星子赴主簿審問。恬稱冤。貴溪縣丞同

祖再鞠如初。款及勅下。弋陽嚴縣丞審問。恬更不復有詞。即供責伏辨。擇日行刑。時四年二月也。臨引赴市。適風雨晦冥。法當停決。如是者凡四申展。輒當陰霖。郡守林子長大。疑焉。密采外議。果云不平。遂躬詣囚所。閱實。從禁鄱陽獄。同斷死兩囚。徑赴法。天晴無片雲。及物色廉究。竟得本末。提點刑獄范子由。秘監選委婺源丞葉南夫。就鄱陽獄質勘。聞恬誦金剛經。不舍晝夜。以問推吏。吏以為歌唱。先是鄱陽主簿江寧何公柏。夢游城外東岳廟。見棟宇宏壯。如宮闕。視平時不類。心固異之。洎到廊廡間。遇亡父朝奉大夫偉。泣而進拜。問曰。大夫命在向地。何自來此。父云。身隸此岳下。奉差來作直推使者。又問此岳何在。曰。在定州。公極顧一室。門上揭榜。以金施四字。曰。朱安恬獄。父揮使去。曰。此非汝久留處。驚而寤。汗出如洗。明日為同官言之。是時恬之冤未白。而公極於獄事。略無干涉也。范獻具奉詔。安恬特與釋放。其元勣覺舉官吏。並免收坐。以五月八日被命。其死而得生。林使君之明也。既而御史張巖肖翁。察舉論奏。凡本縣及州獄。與審勘官吏。皆罷黜。

洞天真人殿

鄆縣人連生。嗜酒不檢束。每飲酒。必插花滿頭。繞街狂歌。人多惡之。因自為蓮花嘗

過近村人家。其廁有古屋一區。敗壁欹危。傳以為藏怪。而莫敢居。連生詣其中。見小道人踞地坐。與之揖。遂共談神仙飛昇事。道人笑指壁間。欹然豁開。乃大殿一所。樓閣參差。殆非凡世可比也。引之入視。碧瓦參差。玉階鱗磴。層閣對崎。清池澄澈。寶殿正中。出金書牌。標曰。洞天真人之殿。兩傍四殿。皆立小牌。曰。北極真人。曰。東界神君。曰。南洞神君。一人著王者服。坐其上。金紫侍立。玉女對舞。霓裳羽衣曲。仙袂飄飄。眾樂競奏。響透雲表。連欲躡級而登。道人不許。出至門外。回望來處。敗屋如初。道人謂曰。汝明日可再來。當奏知真人。言畢。跳入壁中。不見。明日復往。則一切類前所覩。又有張高蓋。乘大馬。傳呼而至。前後簇列。細窺之。似史太師。道人云。此紫府真人來見真人也。與一小青瓜使食。瓜已朽爛。不堪接食。味甚甘香。道人旋導之出。約更五日相會。自是率以為常。時紹熙末年也。慶元戊午。連已六十餘歲。絕煙食。顏色如嬰兒。能言人禍福。其應如響。

古步仙童

餘千古步民陳青。為里中王氏童奴。一日晨起。至門。逢一女子。當前立。容貌娟秀。風儀華楚。陳雖處身僕隸。覺其非常人。問為誰。曰。我乃汝前生妻室。夙緣未斷。故特來。

相問陳未及再發語已隱不見。至夜定來叩其寢所。以通衽席之好。達旦始去。次夕復然。經月餘。女謂陳曰。汝可以用仙童術。游行鄉閭。我當纖悉報汝。陳遂捨主家。自稱仙童。凡遇人邀請。致祝香烟才起。輒降言於梁土。吉凶應驗。盡如親履。其間及就寢。女陪侍自若。旬日後。陳堅坐不出。而四遠傳聞。登跡踵至。皆適其所禱而退。俄一旦招之不應。迫夜問之曰。今日遇入地府。對理一事甚急。故不獲來。以是誤汝。期年女懷孕誕子。細如瓜大。體冷若冰雪。至夏月亦爾。未睥而夭。凡往來兩歲。忽盛飾攜一妾。置酒饌。從容言我生前曾誦佛母咒百萬遍。上帝命往生西方。茲來叙別。詢其託生何地。不肯說。曰。天機秘密。輕泄之。且受災譴。乃盡醉竟夕。泣別而去。雖夜寢絕跡。而副仙童之約如初。陳緣此都受賂謝致富。至今尚存。紹熙初。赴同村李氏。請李素持天蓬咒默誦於室中。陳焚香啟白。久而不降。李為輟誦。如唧唧形言云。裏聞呼卽至。而此家有甲兵無數。蔽空環繞。金剛大神。長十餘丈。執斧而立。無路可進。伺其稍退。方得前耳。他所響答甚多。仙童之為術。最名幻妄。獨是時彰灼如此。

張八道人犬

樂平八間橋農張八公。壯年亡賴。不事生理。而一日忽自悔悟。積善存心。自稱道人。

唯賒放米穀取其贏息以贍家。每歲置一簿。遇貸則書之。已償則勾去。近村程七。借大麥二斗五升。為錢五百。秋成不曾償。至於累歲。張亦不復索。程死後。張育一犬甚俊。麻九年。老而不食。程七之子三百為屠。過其門。張以鬻犬為言。需值五百。程曰。此犬老瘦。能有幾何。只還其半。張令牽去。將至橋。犬盤旋不肯行。遂作人語。呼三百曰。來。我是汝爺。以紹興二年二月某日。賒了張八公大麥。失還錢。今罰作犬。賠填宿債。雖在他家有吠守之勞。然日食糟糠之費。積之不少。汝當盡還元錢。使我託化。子且信。且疑繫之橋柱。反詢張公。乞假紹興故簿檢視。果如所言。遽奉上半。直以犬歸。餵飼加謹。未幾而斃。予以棺衾埋諸野。仍為設僧供資度之。

許寶文女

樂平湖口。許與權寶文宅前臨大溪。築樓創園。家人以春游燕。至夜而歸。幼女忽得疾。全如痴迷。但時自歌笑。許知為祟。所惑羣巫不能治。聞相近白石村僧董仇師。持三壇法著驗。亟請之。仇至曰。此為水怪。易治也。但室屋不清潔。當徙溪畔一寺。加持乃可。於是就助國院齋戒。設壇誦咒。呼三童子考照。後則置供席迎神。童隨卧地。久之乃起。趨入坐廳上曰。還有器刀石。如有之。宜以借我。許宅固有防盜之具。畏其傷

物應曰無。即徑造一室。扃鑰自開。各執一刀出。躍投溪中。僊竭誠臨水咒禁不息。經兩夕寂然。三童父母訴於許。僊曰。此神將憑藉耳。別無害。別關三童。遽趨溪。少焉。其一出告曰。邪魔已落吾手。可使煎麻油三十斤以俟。語訖復入。油鍋既沸。六童共拽一龜大如席。重百餘斤。童競使刀剗剖。納油煮熟。棄之深山。女疾立減。再旬而全安。僊有徒弟。效其術。不葷不酒。亦頗為人驅邪。然脩身不能久。忽破戒。少時而死。僊至淳熙末。以壽終。

佑聖觀夢

趙粹中為吏部侍郎。出至廳上。大門忽開。吏報客通謁。身長七尺。著道士羽服。形容端嚴。視其刺字曰。北方鎮天真武靈真君。趙奉神素謹肅。然起敬趨下迎揖。不敢以主體自居。神固請。趙東向坐曰。侍郎是主人。今日之事。公為政。毋用謙辭。遂就席跼踖而寤。是時孝宗於潛邸王宮。創建佑聖觀。以答在藩禱祈感驗之貺。明日降旨。差趙為奉安聖像使。乃悟夢語。

永寧寺街女子

慶元四年五月十日。夜四鼓。鄮城卜士有未寢者。在所居小樓上。為人推演命麻。聞

慶善橋畔。一人獨行。且叫且喝。由永寧寺前街向西去。約過十餘家。逢一女子。立於門首。相呼問訊。云何妹深夜抵此。當是急幹。女曰。莫要問我處。望東而行。才數十步。又與別男子語。男扣其所往。女曰。記得四月內。小市下王嫂出到寺上看道場。王嫂抱三歲小兒。極可憐愛。我隨逐頗遠。欲撮取之。被師人趕逐。我只在彼不退。兒覺如中惡。昨日遂遭法師。兩次用符攝治。遣我出外。無緣可入。今須且歸。男子曰。適間白西者。似可惱害。三娘同一往可乎。女曰。我一處已受辱。豈宜至再。兼其精神極旺。難親近他男子。曰。三娘真如此識人。試一行。亦不妨。女曰。七哥必要撓他。莫是曾相犯否。曰。恰在慶善橋上。為他喫唾喝我。故欲報之。女曰。既不曾相犯。何如且休。遂寂寂而散。始知前人呼喝者此也。

鬼迎斛盤

鄱陽坊俗。每歲設禳灾道場。不常厥處。慶元四年四月。復就永寧寺大殿。於第四夜。命僧建水陸齋供。加持斛盤。寺前居人多聞外間。若男女相呼喚。或稱兄弟姊妹。姑嫂嫂。請同去迎接斛盤。食輕衣錢財。及齋施已竟。眾僧鳴鑼擊鼓。奉斛出三門。其語頓息。迨過慶善橋。則嘈嘈雜雜。初皆喜悅。驩譟隨至城外。江邊拋散訖。乃寂然。

江絡匠

饒氏江井三居永寧寺東街為匠慶元四年五月病死十日後未黃昏時其僕夏二在室中打屏恍然見之與語云在日藏小兒手鐲一雙婦人金耳環一對金牌一枚用小瓦罐子盛埋於門東壁下可說與我妻掘取將做功德追脩言訖即歿夏僕告其妻發地果得之

彭師鬼孽

鄱陽之俗師巫能事鬼者謂之行頭梁彭師者以慶元元年病死所居在棚巷後二年其妻招民楊二來共居而盡以故夫常用螺牛角售與女巫郝娘已而郝偶從室為鄰當招集鬼神之際彭聞鼓聲輒出至公然現身毆逐下梁者郝懼將所得器物僦之瓦市作場彭妻亦捨之去獨楊二猶處之每夫婦夜寢時必為彭扯拽下地責罵言汝那得趕離我老幼占我房宇晝日亦出拋擊盤盂桌凳楊遂遷居自遇夜則徧敲眾隣門戶稱東鄰西舍全不念故舊既使郝娘奪我行頭又接我門徒知識至今撓害未已彭生為人時傳習妖詐死而自墮業網中真可笑也

槐娘添藥